

大正藏第 02 册 No. 0135

佛说力士移山经 1 卷

No. 135 [No. 125(42.3), No. 136]

佛说力士移山经

西晋天竺三藏竺法护译

闻如是：

一时，佛游拘夷那竭国力士所生地大丛树间，与比丘千二百五十人俱。临灭度时，时国臣民皆出来会。佛问阿难：「斯国大众何故云集？」贤者阿难白世尊曰：「有大石山去此不远，方六十丈高百二十丈，妨塞门途行者回碍，五百力士同心议曰：『吾等膂力世称希有，徒自畜养无益时用，当共徙之立功后代。』即便并势齐声唱叫，力尽自疲不得动摇，音震遐迩，是故黎民辐凑来观。」

佛告阿难：「改正法服严行视之。」阿难受教，即从坐起稽首佛足，独坐拖侍，在佛后翼从而进趣。诸大众五百力士遥覩佛臻，金颜从容，威耀巍巍，端正殊妙，色像清淨，大士相好，庄严其身，降伏阴种，无有衰入，其心湛然，诸根寂定，和悦调隐，为天人最，洪焰晖赫，晃若宝山，如大炬明，照耀幽冥，如大山岗，而有积雪，如日之光，升于朝阳，如秋月盛，众星特明，如转轮王与诸宝臣四部众俱，如树花殖，晔晔繁茂，英艳无量，超出圣躬。五百力士无数之众，瞻戴神变，莫不喜踊，善心荐发普而奉迎，五体自归稽首足下，一心归竦退住一面。

于是，世尊问诸力士：「汝等！何故体疲色頹？」答曰：「今此大石方六十丈高百二十丈，欲共举移，始从一日勤身勦力，至于一月永不可动，惭耻无效取笑天下，是以疲竭姿色憔悴。」「此何所希冀？」力士答曰：「唯然大圣！我之福力莫能踰者，庶几欲徙石光益于世，著名垂勋铭誉来裔，使王路

平直荒域归伏。」佛告力士：「明汝至愍意不堪任，吾为尔移遂汝本愿，使汝戴功慎无愧惧。」力士欢喜启曰：「敬从。」

于时世尊更整法服，以右足大指，蹶举山石挑至梵天，手右掌受，转之三转，置于虚空，去地四丈九尺，还着掌中，三指箴屑吹令销泐，应时三千大千世界六返震动。时诸力士，见佛神变威灵显发，即怀惶怖衣毛为竖，白世尊曰：「此之举指，为是大圣父母恩养乳哺力耶？神足智慧意行力乎？」答曰：「乳哺之势，非余力也。若吾建设神足之力，则能移此三千大千佛之世界，举置殊异百千佛土，都不使人有往来想，不危众生不害地虫。」力士又问：「乳哺之力何所状像？」世尊报曰：「凡牛之力百，当水牛力一；水牛力百，当青牛力一；青牛力百，当牦牛力一；牦牛力百，当竹牛力一；竹牛力百，当草象力一；草象力百，当凡象力一；凡象力百，当黑象力一；黑象力百，当白象力一；白象力百，当龙力一；龙力百，当可畏力士力一；可畏力士力百，当段力士力一；段力士力百，当崩堕力士力一；崩堕力士力百，当大破坏力士力一；大破坏力士力百，当半人乘力士力一；半人乘力士力百，当人乘力士力一；人乘力士力百，当大人乘力士力一；无央数不如如来。至真。等正觉乳哺之力。」佛告诸力士：「汝等当知，是为如来乳哺之力也。」

诸力士白世尊曰：「大圣已现乳哺之力，神足之力为云何乎？」佛告力士：「忆吾昔者与目捷连俱游诸国，时谷饥馑，诸比丘众不得分卫。目捷连白佛：『谷米踊贵人民馁饿，今诸比丘分卫无获，气力衰减不能讲诵，日日转羸惧不全命。往古天地始成之时，地出自然甘露之味，食者康宁四大用安，后人福薄味没于地。今欲反地出古之味，比丘国人普得救命，令得饱满诵经念道。』佛告目连：『且止！假欲反地，地有虫蛾蠕动之类必被危害，又众人福薄，不应服食古之地味。』目连又曰：『我将诸比丘及饥羸民，诣鬻单曰土，使就食自然粳米。』世尊告曰：『其有神足者能自致到，未得轻举安能往乎？』目连答曰：『无神力者，我当扶接使往获安。』目连之德威变若斯，计阎浮提广长二十八万里，其地上广下狭；瞿耶尼域广长三十二万里，其地似半月形；弗于逮域广长三十六万里，其地正圆；鬻单曰域广长四十万里，其地正方；周回遶山为四方域。满中人民令得神足如大目连，一一充溢三千大千世界，不及如来神力，百倍、千倍、万倍、亿倍、巨亿万倍，计空不比无以为喻，是为如来神足力也。」

力士又白：「大圣！已现乳哺、神足之力，愿复示现智慧之力。」世尊告曰：「计大海深三百三十六万里，广长难限，须弥山王在大海中，高三百三十六万里，根在海底亦三百三十六万里，辟方亦尔。其大海水悉可饮尽令无有余，舍利弗智慧不可测量，无能减者。使四方域满中人民，皆令得智慧如舍利弗，一一充溢三千大千世界，不比如来智慧之力，百倍、千倍、万倍、亿倍、巨亿万倍，计空不比无以为喻，是为如来智慧力也。」

力士又白：「大圣！已现乳哺、神足、智慧之力，愿复示现意行之力。」世尊告曰：「假使兴云充遍四域，及三千大千世界普大霖雨，所由来所经历处，若茎节枝叶花实，若器中水山石草芦，蚊行喘息人物之类，大大小小一一涕皆归巨海，悉能分别追而名之，又皆识炼旋而复之不差其本，如来意力悉知悉了无所罣碍，是为如来意行力也。」

力士又白：「大圣！已现乳哺、神足、智慧、意行之力，宁复有异超过此者乎？」世尊告曰：「如来乳哺之力，摩目干连神足之力，舍利弗智慧之力，声闻缘觉意行之力，不比如来十种之力广远难限。」

力士问曰：「何谓十力？」世尊告曰：「悉见微妙远近邪正，处处非处处，有限无限，明审如有则悉知之，是一力也。过去来今诸所报应经历之处，明审如有则悉知之，是二力也。禅定正受三解脱门，明审如有则悉知之，是三力也。覩见众生诸力心本本净无所不了，明审如有则悉知之，是四力也。晓众萌类若干种语，心念不同形貌各异，明审如有则悉知之，是五力也。分别羣黎杂种无量情态各异，明审如有则悉知之，是六力也。智慧如海言善无量，追识一切宿命所更，明审如有则悉知之，是七力也。晓了欲缚解缚之要，所在随行应病授药，天眼见人善恶终始殃福所归，明审如有则悉知之，是八力也。道耳彻听闻天人声，蚊行喘息蠕动之音无所不了，明知如有则悉知之，是九力也。佛无诸漏终始永尽无复缚着，神真叡智自知见证，究畅道行可作能作无余生死，覩十方人众生根本无所不察，明审如有则悉知之，是为十力也。」

诸力士白世尊曰：「大圣！已现乳哺、神足、智慧、意行及十种力，宁有殊异复超诸力乎？」世尊告曰：「一切诸力虽为强盛，百倍千倍万倍亿倍，无常之力计为最胜多所消伏。所以者何？如来身者金刚之数，无常胜我当归坏败，吾今夜半，当于力士所生之地而取灭度，于四衢路供养舍利兴建塔寺。」

所以者何？其四方人赍诸华香，跏立幢幡，悬缯铃盖，然灯奉进，一切皆就真妙之法。」

佛于是颂曰：

「法起必归尽，	兴者当就衰，
万物皆无常，	虑是乃为安。
得百千金山，	福祚难为喻，
不如供泥塔，	欣豫归胜寺。
获宝百千藏，	福庆不可计，
不如供泥塔，	喜踊归胜寺。
设百千宝车，	载色如紫金，
不如供土寺，	踊跃归命佛。」

佛说是经时，诸力士众五百人等，知世无常三界难怙，无一真谛唯道可依，贡高即除不计吾我，皆发无上正真道意，应时皆得立不退转之地。有无央数百千天人，远尘离垢，诸法法眼生。

佛说如是，莫不欢喜，各以头面着地为佛作礼。

佛说力士移山经

【经文信息】大正藏第 02 册 No. 0135 佛说力士移山经

【版本记录】CBETA 电子佛典 Rev. 1.14 (Big5)，完成日期：2010/11/03

【编辑说明】本数据库由中华电子佛典协会（CBETA）依大正藏所编辑

【原始数据】萧镇国大德提供 / 张文明大德二校，维习安大德提供，北美某大德提供，法雨道场提供新式标点

【其他事项】本数据库可自由免费流通，详细内容请参阅【中华电子佛典协会数据库版权宣告】
